

現代生活藝術系列

華嚴經普賢行願品 (1-4)

— 文殊菩薩十信章第一

高雄淨宗學會印贈

華嚴經普賢菩薩行願品卷一

唐國寶國三藏般若奉詔譯 澄觀述疏

◎文殊師利菩薩十信章

大文第二爾時文殊師利童子從善住樓閣下，明其未會。先啓十門。一總顯會意。二定會名義。三五相分別。四圓攝始終。五法界人類。六法界義相。七法界事義。八二位統收。九會數開合。十會主多少。

○今初。謂從佛會流，遍周法界。演暢華嚴，令物遍悟。

人皆法師，觸類皆法。萬籟之聲，皆法輪聲。刹土微塵，皆求法處。方能證入法界真原。故次來也。

○第二定會名義。言末會者，從佛本會而流出故。非微末也。是則前明不異末之本，雖卷而恆舒。此明不異本之末，雖舒而恆卷。本末無礙，同入法界。或名漸證，義亦然矣。寄人歷位，故稱為漸。非於證中有漸頓也。是知前明不異漸之頓，故多門而眾人同契。此明不異頓之漸，故一人而歷位圓修。漸頓無礙，方真證也。由此義故，諸友散說。以本統末，普得稱經。非唯文殊濫觴此

會，實乃普賢朝宗覺場。以菩提場諸會本故，不離覺樹遍法界故。餘如前說。

○第三五相分別者。古德亦有隨文解釋。今依科判。第一寄位修行相。第二會緣入實相。第三攝德成因相。第四智照無二相。第五顯因廣大相。義見前文。此五亦名菩薩五行。一高行。二大行。三勝行。四深行。五廣行。

○第四圓攝始終者。然寄法顯異，而布之前後。據實，一位一行，即攝一切。行位無盡。言差別者，乃即一之多

。一多深淺，無有障礙。

○第五法界人類者。有二十類。一菩薩。二比丘。三比丘尼。四優婆塞。五優婆夷。六童男。七童女。八天男。九天女。十外道。十一婆羅門。十二長者。十三先生。十四醫人。十五船師。十六國王。十七仙人。十八佛母。十九太子時妃。二十諸類神眾。此二十類，攝五十五及剎塵善友。

○第六法界義相者。四義不同。一約果攝化，並是如來海印所現。二約因成行，皆是菩薩隨力現形。三約義顯法，並是緣起法界人法。四約相辨異，不出菩薩五生所收。一息苦生，如良醫等。二隨類生，如外道等。三者勝生，如善見比丘等。四增上生，如大光王等。五最後生，如慈氏等。通即前四各具五生。於中菩薩三處現身。一初文殊信位劣故，唯顯一人。二中間漸進，現於二人，謂大悲正性不異行。後位成滿，顯於三人，謂慈氏文殊普賢菩薩。

○第七法界事義者。通有十門。一正報法界。二依報法界

。三現相。四表義。五言說。六義理。七業用。八說往因。九結自分。十推勝進。此之十門，同一緣起，互融無礙。

○第八二位統收者。此五相中，何以文殊在初，普賢居末。文殊何以二處出耶。所表異故。謂此二聖即法門主。語其所表，略有三重。一能所信相對。謂普賢表所信法界。即在纏如來藏故。理趣般若云，一切眾生皆如來藏，普賢菩薩自體遍故。故初會中即入如來藏身三昧。文殊表於能信淨心。佛名經說一切諸佛皆因文殊而發心者

，以表信故。善財始見，發大心故。後文殊云若離信根，功行不具等，明表信也。要有所信，方成信心。若無能信，長流生死。故能所契合，方為正信。二解行相對。普賢表所起萬行。餘經此教，處處皆說普賢行故。文殊表解。通解理事，方起行故。下慈氏云，汝見善友入解脫門，皆是文殊威神力故。稱解起行，行如所說，目足更資，方為真實之行解故。三理智相對。普賢即所證理。善財入身表所證故。又云，我得究竟三世平等身故，普賢身相如虛空故。文殊表於能證大智。本所事佛，名不動智。見後文殊，即見普賢。明表智圓便證理故。

若理分體用，則方有權實。若體用無礙，則權實雙行。智與理冥，心境一味，為真證故。然體理成智，智能顯理。故雖雙泯，能所歷然。所以後文具明二聖。初信信理，理隱未彰。故初文殊無普賢對。中間解行二俱不彰。欲顯諸位皆是普賢，觸境照解皆文殊故。約文殊門。因解起信，信離無明。以信成解，解非邪見。信解真正，妙智則圓。三為一心，入佛智海，得究竟矣。約普賢門。託理成行，行不外求。因行見理，行非理外。自始至末，法界一如。無有少分非佛智體。既文殊三事融通隱隱，普賢三事涉入重重，方顯遮那頻申三昧難思之果

。故諸聖教，凡所施為，皆有深旨。

○第九會數開合。

○第十會主多少，已見前文。

○十一會釋文。第一寄位修行相。四十一人大分為五。一寄十信。二十住。三十行。四十迴向。五十地。上已略明。當廣說。第一文殊一人寄十信者。信未成位，故唯表十信圓融，泯差別故。若爾，何有三會。欲

遍收故。文分二別。第一明能化發起。第二成彼化事。

爾時文殊師利童子從善住樓閣出。

前中三。一標主出閣。二別明伴從。三總顯出儀。今初。言爾時者，正明眾會大用之時。並不離祇園而遊法界。略舉文殊以示出儀。文殊師利本是童子。前標菩薩，彰具悲智。此云童子，表創入佛法童真行故。悲智相依，即是閣義。悲住生死，不住涅槃。智住涅槃，不住生死。由俱不住，方能俱住，故名善住。從此利生，故稱為出。非暫離也。

與無量同行大菩薩眾。及常侍衛諸金剛神。普為世間現大威力身眾神。久發堅誓，供養諸佛足行神。念昔大願，樂聞正法，相續不斷主地神。深淨大悲，莊嚴法界，普潤眾生主水神。智慧威力光明遍照主火神。摩尼寶冠以嚴其首主風神。光照十方差別儀式主方神。專勤除滅無明黑暗主夜神。一心開現如來智日主晝神。普遍莊嚴虛空法界主空神。能勤方便拔濟眾生出生死海主海神。常勤積集，出過心量，趣一切智，勝幢善根主山神。發大誓願，運度眾生，稱讚諸佛，勇猛無倦主河神。常勤守護一切眾生菩提心城主城神。常勤守護一切眾生諸大龍王。常勤守護一切智城諸夜叉王。常令眾生增長歡喜乾闥婆王。常勤除滅一切餓鬼所有飢渴鳩槃荼王。恆願

拔濟一切眾生度生死海迦樓羅王。願諸眾生普得成就，超諸世間，如來力身阿脩羅王。曲躬恭敬，樂見諸佛種種功德，摩睺羅伽王。深厭生死，常樂瞻仰諸佛相好諸大天王。尊重於佛，恭敬供養，稱揚讚歎諸大梵王。

二與無量同行下，明其伴從。以表般若導萬行故。初一同生。餘皆異生。並約通稱表法為名。故梵本中皆有諸字。隨一一類，有眾多故。

文殊師利與如是等種種色像威德莊嚴大菩薩眾，及諸世主前後圍繞。從自住處，來詣佛所。右繞如來，經無量匝。以諸供具種種供養。供養畢已。頂禮辭退。右繞而

出。住於南方。

三文殊師利與如是下，總顯出儀。前約無住方能化生，從善住出。今約自利方能利他，云出自住處。又前依佛果法界所流。此依自證因門大用。故彰略耳。

△第二爾時尊者舍利弗下，成彼化事。通有三會。一比丘會。表迴小乘可入大故。二諸乘人會。通收諸權皆入實故。三善財會。純一乘機，一生辦故。又前二會表信未久，尚不定故。善財信終，可入證故。今初有二。一明

助化攝機。二明化主攝益。

爾時尊者舍利弗承佛神力，見文殊師利菩薩與如是等諸大菩薩及諸世主種種神通，威德自在，眾會莊嚴，從逝多林安詳而出。作是思惟，我今當與文殊師利俱往南方。

今初，小乘之智亦助大故。文中亦二。一明睹緣興念。

時舍利弗即與眷屬六千比丘前後圍繞。出自住處，往詣佛所。到已頂禮，一心觀佛。具白世尊。世尊聽許。右繞三匝，作禮辭退。往文殊師利童子所。

二時舍利弗下，攝眾同遊。於中亦二。先總辨攝儀。捨小趣大，為出自住處，向文殊所。

此諸比丘，皆舍利弗之所化度。出家未久，自所同住。

後此諸比丘下，別明所化。於中四。一辨定。二列名。三結數。四歎德。今初，一是比丘，義如常說。二是身子弟子，智慧生故。三出家未久，未證實際，可迴心故。信心尚微，須化誘故。四自所同住者，同居權小故，同住法界故，顯此類比丘則可迴心。

所謂海覺比丘，妙德比丘，福光比丘，大悲比丘，電德比丘，淨行比丘，天德比丘，實慧比丘，梵勝比丘，寂慧比丘。

二所謂下，列名。可以意得。

與如是等六千人俱。

三與如是等六千人俱者，結數。而言六者，前之六信，可不退故。本自六根，性清淨故。千表無盡，該果海故。

曾於過去供養諸佛，深種善根。於甚深法，悉能悟解。深信趣入最極清淨。志行寬博，等佛境界。於佛教法，能正修行。悉能了知諸法本性。能大饒益成熟眾生。常樂勤求諸佛功德。皆是文殊師利童子之所教化。

四曾於過去下，歎德。十句分三。初二宿因。次七現德。一悟理甚深。二深信清淨。三志行等佛。四依教修行。五智了本原。六悲能成益。上六自分。七勝進趣求。末後一句，結屬勝緣。明信一乘非無因矣。本屬文殊，非身子分。故所歎德，皆約大乘。不同五百言含本跡。翻顯小乘不知不共。

△第二爾時尊者舍利弗下，明化主攝益。於中二。一身儀攝益。令其根熟，起樂欲心。二語業攝益。正受法門，令其悟入。

爾時尊者舍利弗將諸比丘，隨路而行。觀諸比丘。告海覺言。

前中有四。一示勝境。二得勝益。三詣勝人。四蒙勝攝。今初有三。一標告。

汝可觀察文殊師利清淨相好莊嚴之身。諸天及人，莫能思議。汝可觀察文殊師利圓光映徹，普照十方。能令眾生，心生歡喜。汝可觀察文殊師利放光明網，微妙莊嚴。除滅眾生無量苦惱。汝可觀察文殊師利眾會威德，皆是菩薩往昔善根之所攝受。汝可觀察文殊師利所行之路，左右八步，清淨平坦，眾寶莊嚴。汝可觀察文殊師利所住之處，周迴十方，常有道場顯現莊嚴，隨逐而轉。汝可觀察文殊師利所行之路，具足無量福德莊嚴。左右兩邊，皆有伏藏。種種珍寶，自然而出。汝可觀察文殊師利由昔供養諸佛善根，隨其所在，有雜寶樹。於其樹間，寶藏開敷，出莊嚴具。汝可觀察文殊師利，隨其所在，一切世主與供養雲，雨諸供具，周布陳列，以為供

養。汝可觀察文殊師利，十方諸佛將說法時，悉放眉間白毫光明，來照其身，從頂上入。

二汝可觀下，正教觀察。有十勝德。一身相勝。二常光勝。三放光勝。四眾會勝。五行路勝。常依八正，為八步平坦。逆順不離，故云左右，右隨順故。住正道者，則不分別是邪正故。六住處勝。舉足下足，無非道場。隨心迴轉，萬德嚴故。七福嚴勝。常觀空有一異等邊。心地之下有如來藏，故名為伏。恆沙性德，為種種寶。無心忘照，任運寂知，則能顯現，為自然出。八林樹勝。樹立萬行，則如來藏從其行流，嚴法身故。九自在勝

。於我無我得不二解，自在主中為最尊故。十上攝勝。此有二意。一約事說。心常上攝諸佛法故，是諸佛師。諸佛將說，敬法本故。二約表法。諸佛顯揚，皆依般若，究竟至於一切智故。

爾時尊者舍利弗為諸比丘稱揚讚歎開示演說文殊師利如是無量種種功德具足莊嚴。

三爾時尊者下，結略顯廣，可知。

時諸比丘聞是讚已。心意清淨。信解堅固。踊躍歡喜，

不能自持。形體柔軟。諸根和悅。垢障咸盡。憂苦悉除。常見諸佛。恆聞正法。迴向趣求一切智智。成就菩薩無礙善根。逮得菩薩無量諸力。出生無盡圓滿大悲。發起無邊廣大誓願。深入諸度，究竟彼岸。十方佛海皆悉現前。於佛境界深生信樂。

一時諸比丘聞是下，得勝益。上既勸觀。必當修觀。上根宿善，頓益遙聞。益相可知。

即白尊者舍利弗言。唯願和尚將導我等，親近於彼勝妙丈夫。時舍利弗即與俱行，詣文殊師利童子所。見已，頂禮白言。仁者。此諸比丘願得奉觀。

三即白尊者下，詣勝人。遙聞勝德，已獲法門。親承法音，必成大利。故欲詣也。

爾時文殊師利童子，與無量自在神通菩薩圍繞。并其大眾種種眷屬。如象王迴，觀諸比丘。

四爾時文殊下，蒙勝攝。迴觀法器，是攝相故。如象王者，身首俱轉，無輕躁故，表全向機，無遺隱故。眷屬俱者，觀照眷屬，盡令觀故。

時諸比丘，頭面禮足，恭敬合掌，白如是言。惟願大聖

文殊師利，和尚舍利弗，世尊釋迦牟尼，悉當證知。我等今以得見大士勝妙丈夫奉覲瞻禮恭敬信樂所有善根，及以我等過去所集福智善根，以此善根願令我等於仁所有如是色身，如是相好，如是音聲，如是自在，一切功德，悉當具得。

第二時諸比丘頭面禮下，語業攝益。於中二。先設敬興願。義當問法。

爾時文殊師利菩薩告諸比丘言，若善男子善女人成就十種趣大乘法無疲厭心。則能速疾深入如來究竟之地。況菩薩地。

第二爾時文殊師利下，正明語攝。義當答問。於中三。

一明受法。二辨得益。三總結所作。初中亦三。一舉益標告。二別示行法。三舉益勸修。今初。迴小入大，先發大心。眾生無邊，法門無盡。愛見取相，疲厭是生。退墮二乘，失諸勝德。若廣大願行而無取，佛果非遠，況我因耶。

何等為十。所謂見諸如來以廣大心親近供養心無疲厭。積集成就一切善根究竟不退心無疲厭。勤求一切諸佛正法心無疲厭。勤行一切菩薩殊勝諸波羅蜜心無疲厭。普遍修習一切菩薩甚深三昧心無疲厭。次第趣入三世流轉

一切諸法心無疲厭。莊嚴十方一切剎海悉令清淨心無疲厭。教化調伏一切眾生皆令成熟心無疲厭。於一切剎行菩薩行經一切劫心無疲厭。為欲成熟一眾生故，修一切剎極微塵數波羅蜜門，成就圓滿如來一力。如是次第為一切眾生成就如來一切智力心無疲厭。

二何等為十下，別示行法。初徵。後列。十句五對。一外緣內因。二求法成行。三深定妙智。四嚴剎調生。五長時廣大，廣大亦勝進也。此與初地十種大願大同小異。今略會釋。一即供養諸佛願。二即三業不空願。故彼願云，承不退輪，修菩薩行，身語意業悉不唐捐。今云

成就善根究竟不退。義全同也。三即受持願。四即修行二利願。五即不離願。不離勝友同修行故。故彼文云，願與一切菩薩同一志行。今唯三昧，則志願常同。六即承事願。彼約橫遍承事，此約豎窮承事，為小異耳。七即淨土願。八即成熟眾生願。九即攝法上首願。遍剎隨佛轉諸法故。十即成正覺願。以成佛力即正覺故。如來一力，已用一切剎塵因成，況無量力。為一眾生既修多度，眾生無量，此心無疲，真菩薩矣。

比丘當知，若善男子善女人成就深信，發此十種無疲厭

心。則能長養一切善根。捨離一切生死流轉。悉能超出一切世間。不墮聲聞辟支佛地。成就如來一切種性。滿足菩薩清淨大願。積集一切如來功德。修行一切菩薩諸行。獲得如來力無所畏，摧伏眾魔及諸外道，滅除一切煩惱習氣。入菩薩地，近如來地。

三比丘當知下，舉益勸修。亦有五對。一長善離生。二超凡越小。三成性滿願。四習果修因。五摧邪入證。

時諸比丘聞此法已。即時同證廣大三昧，名見一切佛境界無礙眼。

第二時諸比丘聞是法下，得益。於中二。先明定體。彰定用。今初。無礙三義。一能見離障故。謂不作相無作相，在三昧故。二所見無擁故。故文說見一切佛。三一具多用故。如下用中。

得此三昧威神力故。悉見十方一切世界諸佛如來及其所有道場眾會，亦悉見彼一切世界所有眾生種種趣類各各差別，亦悉見彼一切世界同異染淨各各差別，亦悉見一切世界所有極微塵相差別，亦悉見彼諸世界中一切眾生所住宮殿種種莊嚴種種成就及所受用種種資具各各差別。及聞彼佛諸音聲海演說諸法種種名句文辭訓釋性

祕密，悉能解了。亦能觀察彼世界中一切眾生心行根欲各各差別。亦能憶念彼世界中一切眾生過去未來各十生事。亦能憶念彼世界中過去未來各十劫事。亦能憶念彼諸如來十本生事，十成正覺，十轉法輪，十種神通，十種記心，十種教誡，十種說法，十種辯才。

二得此三昧下，彰其定用。具十大用。文有三節。初四外通用。次五內德用。後一遍調身心用。今初。一天眼用。二及聞彼佛下，天耳用。三亦能觀察下，他心用。四亦能憶念下，宿住用。神境漏盡等義在結中。

又由得此三昧力故。即時獲得十千真實菩提之心。成就

十千甚深三昧。具足十千諸波羅蜜。圓滿十千智慧光明。發起十千自在神力。

二又由得此三昧故下，內德用。一發多大心。定中發心，故云真實。義同證發。二多三昧。謂即一之多，是難行定。三多度門。四多智照。五多神力。神力多約內身任持。

以得如是菩薩三昧種種威神無礙勢力所莊嚴故，令其身心柔軟微妙，增長信樂。住菩提心，堅固不動。

三以得如是下，遍調身心，總結成益。圓教攝機，創發大心，頓得菩薩十通等用。況十表無盡，一一十千皆以法融，初後無礙。非是次第修習之力。菩提心品廣說其相。

爾時文殊師利菩薩具足安住真實吉祥微妙功德普賢勝行。勸諸比丘令其安住勝普賢行。住勝行已，入於甚深廣大願海。入願海已，普遍成就甚深大願。以得成就大願海故，得心清淨。心清淨故，得身清淨。身清淨故，得身輕利。身輕利故，則得廣大不退神通。以得如是大神通故，不離文殊師利足下，普於十方一切世界諸如來所，悉現其身。具足成就一切佛法。

第三爾時文殊師利菩薩具足安住下，總結所作。亦勝進益。於中三。初明自住。次勸諸比丘下，彰其化法。上明發心，今勸住行。後住勝行已下，展轉成益。略有八重。并上為十。以顯無盡。上來六千比丘會竟。

爾時文殊師利菩薩勸諸比丘發阿耨多羅三藐三菩提心已。

第二爾時文殊師利菩薩勸諸比丘下，諸乘人會。文中四。一結前所作。二至所化處。三顯所說法。四明所益眾。今初可知。

漸次南行，經歷人間城邑聚落，至福生城。於其城東，住莊嚴幢娑羅林中，往昔諸佛曾所止住，教化成熟一切眾生大塔廟處。亦是世尊毗盧遮那於往昔時行菩薩行，能捨無量難捨之處。是故此林名稱普聞無量佛刹。此處常為天龍夜叉乾闥婆阿脩羅迦樓羅緊那羅摩睺羅伽人非人等恭敬供養。

一漸次南行下，至所化處。其城居人多生福德，故曰福生。城表防非，即真法界。一切眾生自此出故。東為方首，啓明之初，表順福善，入道初故。又表福智，入位本故。娑羅林者，此云高遠。以森聳故。當起萬行，莊

嚴法身。能摧障蓋。故稱幢也。大塔廟者，具云寧堵波，此云高顯。昔云塔波，義曰歸宗之所。廟者貌也，世尊貌故。日照三藏云，此城在南天竺。城東大塔是古佛之塔。佛在世時已有此塔。其塔極大，東面鼓樂，西面不聞。於今現在。居人多唱善財歌詞。此城內人並有解脫分善，堪為道器。表所依法界本覺真性，諸佛同依。是故復云往昔諸佛曾所止住。

時文殊師利與諸眷屬到此林已。即於其處坐師子座，說脩多羅，名普照法界圓滿光明。百萬億那由他脩多羅以為眷屬。

三時文殊師利下，顯所說法。智用宏舒，故云普照。所照深廣，即真法界。此是正說入法界經。

說此經時，有無量百千億那由他諸大龍王并其眷屬，聞此法已，自厭龍趣。於佛功德深生愛樂。咸捨龍身，生人天中。一萬諸龍於阿耨多羅三藐三菩提得不退轉。復有無量無數眾生於三乘中各得成熟。

四說此經時下，明所益眾。略有二類。先明諸龍得主教意。云求佛道，即住海水，堪受得聞。後復有無量下，攝三乘機，得眷屬教。隨器益故。

△自下第三時福城人下，攝善財會。先啓十門。一總彰大意。二修入眾殊。三示方不同。四趣求有異。五見處差別。六教遣不同。七歎不歎別。八推不推別。九結不結異。十去住不同。今初中，夫如來垂跡，遇盡宿緣。海會塵沙，大器非少。善財偏舉，其故何耶。釋有多意。一舉一例餘，以警未悟。彼在童子，少而老成。勉乎行人，白首自媿。彼既能爾，我安自欺。故下偈云，信樂堅進力，善財成此行，若有敬慕心，亦當如是學。又學如魚子，成者如魚。以勵行人，有始有卒。故下經云，

既發心已，又能如是如救頭然等。日月發輝，螢燭無彩。大士現跡，道掩餘乘。故經云餘諸菩薩於無量劫方能淨修菩薩行願，今此童子一生皆辦。化不在多，一便當終。行不在久，得意頓超。況久積淨因，何不速證。靡論凡聖，意在放修故。

○二修入眾殊者。唯初信內，三會四眾。欲令普信，意顯通收。入住已去，善財一身。顯行在己，入位希故。

○三示方所不同者。大位有三。初地前知識，多在南方。

地上無方。地後兼二。然云南者，古有五義。一舉一例諸。一方善友已自無量，況餘九方。此一約事。餘四約表。二者明義。表捨闇向智。南方之明，萬物相見。聖人南面，蓋取於此。三者中義。表離邪僻東西二邊，契會中正一實道故。四者生義。南主其陽，發生萬物。表於善財增長行故。北主其陰，顯是滅義。背於趣寂而滅惑故。世尊涅槃，金棺北首，正取歸滅。五隨順義。背左向右，右即為順。西域土風，城邑園宅皆悉東向。自東之南，順日月轉。彰於善財順教理故。地上正證，離於證相，不以南表。地後業用，有無無礙。文殊有示而

無方者，表於般若加行有修，正證無二。普賢無方亦無示者，表真法界德普周故。有人唯取隨順一義，非前諸釋。以正明義，出此方故。寧知西域南非明等。況通方教，言有多含。貴在虛求，何必執定也。

○四趣求有異者。略有三別。最初文殊自往福城。根尚微故。未發心故。大悲深故。二德雲下，善財往求。根漸勝故。已發心故。彰重法故。三者普賢知識不就，善財不往。法界位滿，無來去故。

○五見處有差別者。三賢未證，散在諸處。地上證真，生在佛家，多居佛會。地後起用，亦散隨緣。普賢因圓，必剋滿果，還居佛所。

○六教遣不同者。初之文殊，若約事說，前無友故。若約表者，表信內熏，託理而起。前更無遣。見後文殊，般若照極，自見普賢一真法界。故亦無遣。中間諸友，顯大緣起萬行相資，方得圓滿。故皆教遣。教遣之義，下當廣明。

○七歎不歎別者。初文殊中，未發心前，所以不歎。教發心已，方乃歎之。後二不歎，表位滿故。離心相故。中間諸友，皆應有歎。其不歎者，略有二緣。一正在定，如海幢等。二行逆化，如勝熱等。歎違逆化，亦誠初心莫取詭異為真道故。過此二緣，餘無者略。

○八推不推別者。諸友皆悉謙己知一，推勝知多。初一後三，闕斯二事。為顯人尊，德已備故。而有遺者，令其增修無厭足故。亦表所主法門異故。不推佛者，顯於果海離修相故。又佛屬本會，普賢讚德，義當推故。

○九結不結異者。唯有普賢，結通十方塵刹成益。彰位已滿，法界理周。餘皆反此。

○十去住不同者。末後二位無有辭去。文殊無身，彰離相故。普賢位極，周法界故。餘皆辭去，學無常師，成勝進故。

○次正釋文。文分四別。第一四部雲奔。第二三業調化。第三上根隨逐。第四大聖重教。

時福城人聞文殊師利住莊嚴幢娑羅林中大塔廟處。皆從城出，來詣其所。有優婆塞名曰大慧。與其眷屬五百人俱。所謂須達多優婆塞，寶德優婆塞，圓光優婆塞，名稱天優婆塞，月吉祥優婆塞，月喜優婆塞，月智優婆塞，大智優婆塞，賢護優婆塞，賢吉祥優婆塞。如是等眾，前後圍繞，來詣文殊師利童子所。到已禮足，右繞三匝，卻坐一面。復有優婆夷名曰大慧。與其眷屬五百人俱。所謂妙圓光優婆夷，梵德優婆夷，吉祥優婆夷，妙臂優婆夷，賢光優婆夷，賢吉祥優婆夷，月光優婆夷，星宿光優婆夷，賢德優婆夷，妙眼優婆夷。如是等眾，前後圍繞，來詣文殊師利童子所。到已禮足，右繞三匝，卻坐一面。復有童子名曰善財。與其眷屬五百人俱。

所謂善禁童子，善戒童子，善威儀童子，善行童子，善思惟童子，善智童子，善慧童子，善眼童子，善臂童子，善光童子。如是等眾，前後圍繞，來詣文殊師利童子所。到已禮足，右繞三匝，卻坐一面。復有童女名曰妙賢。與其眷屬五百人俱。所謂大慧童女，善賢童女，端嚴面童女，堅善慧童女，吉祥賢童女，吉祥智童女，供養德童女，吉祥圓光童女，妙覺童女。如是等眾，前後圍繞，來詣文殊師利童子所。到已禮足，右繞三匝，卻坐一面。

今初分二。先總明。後有優婆塞下，別顯。四眾即為四別。二眾中文皆有三。初標主屬。次所謂下，列別名。

後如是等下，結威儀住。今初第一優婆塞者，此云近事男。親近比丘而承事故。二優婆夷，此云近事女。近比丘尼而承事故。此二並由受五戒故，立近事名。三童男。四童女。其間別名，各有本緣，可以思準。皆五百者，五位證入，通四眾故。共成二千普賢行故。

△第二爾時文殊師利童子知福城下，三業調化。於中二。先身意調機。二當根授法。

爾時文殊師利童子知福城人悉已來集。普遍觀察，隨其心樂，即以神力現自在身，威光赫奕，蔽諸大眾。以大

慈力，令其眾會皆得安隱，清涼快樂。以大悲力，起說法心，普遍成就。以大智力，令其開悟，滅除一切煩惱心垢。以無礙辯，將說甚深廣大佛法。

前中亦二。先總調大眾。後別觀善財。今初。身示威光，意流慈智，為說方便。是故經云起說法心。

復於是時觀察善財，以何因緣而立此名。

二復於是時下，別觀善財。知其不群，特迴聖眷。善財會名，因此而立。雖有五百，非遍為故。於中分二。一

標以徵起。

知此童子初入胎時，於其宅內，自然而出七寶樓閣。其樓閣下，有七伏藏。於其藏上，生七寶芽。所謂金，銀，琉璃，玻瓈，赤珠，砮磈，瑪瑙。善財童子處胎十月，然後誕生。形體端正，肢分具足。其七伏藏，縱廣高下，量各七肘。忽自開現。光明照耀。內外家族，視之無厭。復於宅中自然而有五百寶器。珍奇雜寶，各各盈滿。所謂金剛器中，盛滿諸香。於香器中，盛種種衣。美玉器中，盛滿飲食。摩尼器中，盛滿雜寶。黃金器中，盛滿銀粟。白銀器中，盛滿金粟。金銀器中，盛滿琉璃。琉璃器中，盛滿金銀及摩尼寶。玻瓈器中，盛滿砮

磈。砮磈器中，盛滿玻瓈。瑪瑙器中，盛滿赤珠。赤珠器中，盛滿瑪瑙。星幢摩尼器中，盛滿水精摩尼。水精摩尼器中，盛滿星幢摩尼。如是等五百寶器，自然出現。復於宅中遍雨種種珍寶財物，及諸資具。一切庫藏，悉皆充滿。以此事故，父母親屬及善相師，共呼此兒，名曰善財。

二知此童子下，別觀因緣。於中亦二。一觀外緣。二觀內因。前中復二。先別明。後以此事下，總結。財多屬依，善通依正。生而財現，是其善相，稱曰善財。小聖尊空，生而空室。大士貴德，生多法財。

又知此童子已曾供養過去諸佛。深種善根。信解廣大。常樂親近諸善知識。身語意業，皆無過失。勇猛精進，淨菩薩道。求一切智，成佛法器。心行清淨，猶如虛空。

二又知此童子下，觀其內因。據此觀因，亦非聊爾。但未入位，福智所資。亦似布衣深蘊德行。又此稱善，對上為財。又解心順理曰善，積德無盡曰財。文有十句。初二宿因。信解已去，通其過現。舊經末句云，迴向菩提無有障礙。今經略無。

爾時文殊師利菩薩如是觀察善財童子殊勝相已熙怡微笑，安慰開諭。

第二爾時文殊師利菩薩如是觀察下，當根授法。於中三。一結前生後。法有所付，所以熙怡。令自寶持，故須安慰。

廣為演說一切佛法。所謂說一切佛積集法。說一切佛相續法。說一切佛次第深入法。說一切佛眾會清淨法。說一切佛法輪化導法。說一切佛色身相好清淨法。說一切佛法身普遍成就法。說一切佛無礙辯才法。說一切佛圓

滿莊嚴法。說一切佛平等無二法。

二廣為下，正授法門。初總。所謂下，別。別有十句。初一因法，謂積集萬行。次八果法。後一通因通果，通理通事。

爾時文殊師利童子為善財童子及諸大眾說此法已。復以種種善巧方便殷勤勸諭。令其開覺，增長勢力，生大歡喜，發阿耨多羅三藐三菩提心。又令善財憶念過去所種善根。復為福城一切人眾，隨其根欲，顯現神通。如所應度，廣為說法。然後而去。

三爾時文殊師利為善財下，結說勸進中。結前所說，普及無偏。指前因法，勸令修進。令發大心，求前佛果。令憶宿善，使不自輕。餘非此機，隨宜更演。

△第三爾時善財下，上根隨逐。同餐妙旨，獨穎眾流。重法隨師，說偈求度。文中二。先序說因。二正陳偈頌。

爾時善財童子從文殊師利童子所，聞說諸佛如是種種勝妙功德大威力已。勤求愛樂阿耨多羅三藐三菩提。隨逐文殊師利，瞻戀不捨，一心歸向，合掌諦觀，而說偈言

今初。已發心故。此菩提心為當何位。善財童子為聖為凡。古有多釋。一云，即地上菩薩。言發心者，證發心也。一云，此是地前實報凡夫。但有宿善，信根現熟。有云，古不足依。自引安住地神文云，此人已生法王種中。斯文可定。自為二解。一謂智契法性，生在佛家，名法王種。即已入地。二謂據多聞熏習，勝解真性，成就佛種，名生法王種中。即三賢內種姓菩薩。然此師解，依於前義，不異初師。依於後義，未殊次解。何足異

焉。又法王種證為定者。慈氏經文，復云何通。彼云，餘諸菩薩經無量劫，今此童子一生之中淨菩薩行。又見普賢等於諸佛，成於智度，復是何位。無執一文，自相鉅楯。賢首釋云，應是善趣信行中人。依圓教宗，有其三位。一見聞位。即是善財次前生身，見聞如是普賢法故，成解脫分善根。如前歎德中辨。二是解行位。頓修如此五位行法，即如善財此生所成至普賢位是也。三證入位。即因位窮終，沒同果海。善財來生是此位也。若爾，定是何位。謂在信是信位。在住是住位。一身歷五位，隨在即彼收。以遍一切故。如普賢位。此之一解，

甚順經宗。意云，下寄五位即是所證。更有一理。歷位而修。得見普賢，一時頓具。地獄天子尚一生內三重頓圓，何以善財尅定初地。寧可知推。凡聖難測。

△二正陳偈詞。昔是五言，今是七字。舊經三十四，今成三十七。加第一偈，及三十五六。大分為三。初一偈標讚求度。次三十二偈別讚求度。後四偈結讚請說。

有大智慧威神力	行菩提行利眾生
無量境界誓當求	唯願仁尊哀聽許

今初。前半讚文殊德。上句自利。下句利他。後半求度。上句標有大心。下句請聽後說。

△第二三十二偈別讚求度中二。前四偈傷己沈溺，自勉不能。餘偈仰德依人，請垂拔濟。前中通明迷於苦集，失於滅道。造因趣果，生死長淪。具業惑苦十二有支。且分為二。先二偈明迷苦集故，煩惱為因而受苦果。後二偈明失滅道故，以業為因而受苦報。

愛水深澆為池塹	憍慢高舉為垣牆
諸趣出入為門戶	三有難超作城郭
癡闇無明常所覆	貪恚熾盛火恆燒
魔王自在處其中	愚童凡夫依止住

今初八句。初二句潤業煩惱。第五六句發業煩惱。即六地經云，無明所覆，愛水為潤，我慢溉灌。初地經云，無明覆翳，立驕慢高幢，入渴愛網中。又此三類，謝往過去，總名無明。十地論名根本無明迷法義過。謂癡闇無明常所覆者，即迷法過。法謂心體。由迷心體第一義

故，而造諸業。揀餘發業通稱無明，故文特云癡闇無明。六地經云，不了第一義諦故名無明。然諸煩惱，皆悉發業。故下句云，貪恚熾盛火恆燒。具三毒矣。而發業位，無明力增。故諸經論多說無明而能發業。其初二句即迷義過。第二句迷內無我。染自陵他，生於驕慢。長流生死，高而難踰。故喻垣牆。六地經云，三界受生，皆由著我。第一句即迷外過。妄謂我所及外境界而生愛染。非愛不生。愛著不出。故比池塹。三四兩句即是苦果。既發既潤，集因已成。故六趣門中，出入不息。三界城內，戀著不離。第七句起惑之緣，苦果之主，故曰

魔王。第八句起惑之者，受苦之人。以上因緣，長淪苦果，豈非愚童。

詔誑忿恨惑亂戲	貪欲所纏如胃索
疑惑所蔽若生盲	恆行險趣諸邪道
常為慳嫉之所縛	入於三塗八難中
五趣輪迴不覺知	恆受生老病死苦

後二偈明失滅道。以業為因而受苦果。即由前無明而起行也。於中末後三句，所起苦果。前之五句，以惑造業

。於中其惑亂戲，及恆行險趣諸邪道，正明起業。餘即別說業俱煩惱。由前迷執我我所故。以我對所，而生三過。一於未得處而生詔誑。二於不可得處便生嫉忌。三於已得者便生慳吝。由瞋造業，故生忿恨，結怨於心。此思之始。其惑亂戲，即思之終。初地經云，以忿恨風，吹心識火，熾然不息。熾然不息即惑亂戲。由惑起業，無定無實，名為亂戲。故楞伽云，譬如技兒，變現自在。即是所吹心識火也。貪欲所纏如胃索者，由貪造業也。為有造業，豈有出期。疑惑所蔽若生盲者，由癡造業也。六地經云，不正思惟，起於妄行。疑惑即是不正

思惟。不正思惟是無明因，亦無明攝。故若生育。迷於異熟及勝義諦，竟無所見。恆行險趣諸邪道者，正明失道造業之過。恆行險趣，就人彰過。諸邪道者，就法彰過。道即業因，謂福等三。橫集曰諸。常集為恆。不動善業，惑俱亦邪。況行十惡外道邪行。故初地云，凡所作業，皆顛倒相應。末後三句所起果中，初句惡果。次句通善惡。由不覺知即是無明，故有後句恆受苦過。故涅槃說一切眾生因無明生，亦因而死。意願有智則無生死。由上四偈通敘眾生。故下濟我便為兼濟。

△第二滅惑大悲下二十八偈，仰德依人，請垂拔濟。於中二。前十三偈讚人求法。後十五偈讚法求乘。

滅惑大悲清淨日	智光普照圓滿輪
能竭生死煩惱海	願降慈光少觀察
圓滿大慈清淨月	福德光明無垢輪
一切眾生咸施安	願賜清涼少觀察
一切法界功德王	白業成就為輪寶
所向導前無所礙	願順我心垂教救
廣博福智大商主	勇猛不退求菩提

普利一切諸眾生	唯願垂慈拔濟我
身被最勝忍辱甲	手提明利智慧劍
常能自在破魔軍	願雄猛者守護我
安住妙法須彌頂	繞以三昧諸天女
摧滅業惑阿脩羅	真實帝釋願觀我
三有昏闇凡愚宅	煩惱輪迴地趣因
仁尊永滅盡無餘	照世真燈示我道
眾生惡趣行已除	修治善道咸清淨
度諸有海橋梁者	示我真乘解脫門
常樂我淨顛倒想	厚重邪執常迷覆

明利智眼悉能除	開我真乘解脫路
善了真諦無迷惑	於諸法中無所畏
調伏眾生自在人	願示於我菩提道
安住如來正見地	增長諸佛功德樹
雨一切佛妙法華	願速示我菩提道
去來現在一切佛	如日光明出世間
為眾能開甘露門	彼所得道願宣說
能善解除諸業縛	巧轉諸乘妙法輪
智慧決了自在人	示我普欲摩訶衍

前中。各上三句讚文殊德。末後一句正求運濟。於中亦二。先有六偈對迷苦集，希垂拔濟可知。後有七偈對失滅道，冀成行果。於中四。初一偈總求真道。謂三界九地六趣苦果，煩惱集因，仁皆已滅。必有滅因，以為真道。二有二偈求涅槃道。前偈滅十惡行，求對治道。後偈滅四倒因，求智照道。三有二偈求菩提道。前偈求根本智以見法原。後偈求後得智成諸功德。四有二偈求見道緣。對上魔緣，願依諸佛。

△第二大悲為轂下，歎法求乘。帶喻說法。謂前失正道，

常行邪道，猶如步驟。今修萬行，常行正道，同彼安車。此十五偈總說一車體用莊嚴，而偈偈有結，顯隨一行皆是一乘。或事或理，或因或果，總合為一不思議乘。一運便能一切皆運。文且分三。初四偈求萬行利他普濟乘。二有三偈求十度自利圓滿乘。三有八偈求二利滅障廣大乘。若依行布，此之三段，初一地前，次一地上，後一地後。而諸位互融，合為一乘，圓修無礙。如離輪轂輻輳等外，更無別車。離萬行外，無別乘體。因果交徹，事理該融。不同餘宗，體嚴各異。

大悲為轂行願輪	信轄深固堅忍軸
淨功德實真實轅	令我載此菩提乘
一切總持圓滿箱	慈愍普覆莊嚴蓋
妙辯才音鈴震響	令我載此最上乘
清淨戒品為茵蓐	諸妙三昧為采女
法鼓洪音警有情	令我載此摩訶衍
具足四攝無盡藏	莊嚴瓔珞功德寶
自他慚愧為羈鞅	令我載此無上乘

今初利他中四偈，有十三事。初偈有五。一一切佛法，

皆依大悲。如以眾輻，湊於一轂。二行願相扶，運至菩提。如有兩輪，方能致遠。三深信入法，如轄貫定。四堅忍不動，如軸居心，輪等依轉。五淨德居前，如轅為引。依斯五義，可證菩提。是故結云菩提乘也。下結例然。皆取釋中本意立名。次偈三義。一總持攝法，如箱攝物。二慈蔭清涼，如張幪蓋。三四辯演暢，如鳴鑾鈴。具此三行，乃為最勝。次偈三義。一淨戒嚴潔，如淨茵蓐。二三昧適神，如侍采女。三法音警物，如擊鼓聲。具此三法，稱為大乘。後偈二義。一四攝蘊德，如藏含寶。四攝悅物，如瓔周垂。二牛有羈鞅，可以引車。

人有慚愧，方能導行。慚者自不作惡。愧者不令他作。故云自他慚愧。又依唯識依願自法，崇重賢善，即名為慚。依願世間，輕拒暴惡，即名為愧。故云自他。具上慚愧以用莊嚴，為無上乘。略舉十三以為體式。類顯萬行皆能利他。

常放大捨圓滿光

恆塗淨戒真實香

永滅煩惱瘡疣者

令我載此最勝乘

三業調伏不退輪

六根寂靜三昧箱

最勝智慧方便軌

令我載此妙法乘

大願回向善御者

總持諸法堅固力

智慧周旋常遍轉

令我載此速疾乘

二有三偈十度自利圓滿乘者，十行十地皆此成故。初偈三度，一車既實成，故有光等。三施圓滿，悅物如光。二掩破戒垢，令法身潔，如塗香也。三內忍貪瞋，則外違順不能傷害，為滅瘡疣。此於車上是不破義，是無損義。故梵本云，瘡疣已滅如金剛。此之三度，成大財體及多眷屬，增上生道，故為最勝。次偈四度，一三業摧障，圓滿名輪，不退為勒，如車速進。二善守根門，六

處常寂，如箱持物。然前段中總持為箱。今何重出。此依舊經。若梵本云，堪用禪中勝三昧。意取禪能空心，如車中虛，有車之用。三四般若方便二度合明。謂上轅為功德。今輓在轅端，明智慧方便為眾德首。方便成事。般若成度。事理相望，如輓二頭。權實交徹，如唯一輓。牛能引此，何行不前。然進伏煩惱，定熟有情，慧成佛法。此三已名決定勝道。況慧有權實，故為妙法。後偈三度，一牛若有御，隨心能到。行若有願，無事不成。能向眾生菩提實際。二車能有載，實由堅持。法若不散，在總持力。三御者有智，能隨水曲。願行有智，

迴轉普周。具此後三，正覺疾滿。

交絡普賢諸行網	悲心廣運能徐轉
所行無畏得安詳	令我載此無上乘
任持堅固等金剛	妙智巧成如幻事
一切障礙皆能斷	令我速載普賢乘
大慈無垢等群生	普與世間賢聖樂
淨智如空照法界	願速令我載此乘
能淨一切業惑塵	亦斷世間流轉苦
摧伏諸魔及外道	令我載此妙法乘

智慧境界等虛空	行力莊嚴遍法界
普滿一切群生欲	願速令我載此乘
志樂清淨量難窮	無明愛見皆除滅
利益一切心無盡	願速令我載此乘
願力如風速疾行	定心安住恆無動
普運一切諸含識	願速令我載此乘
堅誓如地永無傾	大悲如水恆饒益
勇健荷擔無疲倦	願速令我載此乘

三交絡普賢下八偈，二利滅障廣大乘中，斯即地後，義

兼果乘。初偈三義，一普賢行即是總句，普賢位故。以網交絡，遍於一車。以普賢行，籠一乘體。二悲故廣運無緣名徐。三不疾而速故行無畏。不畏眾生難可化故。舊經梵本並無安詳。梵云寂靜行中勇猛修，舊經云所向皆無性，明是無緣能速進義。第二偈三義，一以無垢智，如車堅淨。二幻智隨意，如車巧成。梵云幻智妙作妙成就。三已斷二障，如車無礙。舊云一切無障礙。言含法喻。具上三義，故為速疾。第三偈經文闕喻，唯有法合。初句取淨義。二取安樂。三取廣博如空，梵云法界廣博能普照。結句合云無上乘。第四偈亦唯有法。一取

免塵。二取代步。三取輪摧。餘之四偈，亦唯有法。或略不說喻。或不喻車。顯車事少，法門多故。據上法喻，無德不備。依此而修，必能速運。故願令賜，冀得親乘。

普照眾生智慧日
總持勝妙清淨光
能於劫海勤修學
摧滅堅執有為城
仁於諸佛大智海

四攝光明圓滿輪
願示於我咸令見
一切種智圓滿因
與我如是金剛智
獲是智海廣無涯

一切佛德靡不充
已入法王妙法城
已繫諸佛離垢縉

善哉大聖當宣說
已冠智王大智冠
最勝智眼願觀察

第三四偈結讚請說可知。

△第四爾時文殊師利菩薩如象王下，大聖重教。文中四別。

一略讚略教。二廣問廣答。三指示後友。四念恩辭去。

爾時文殊師利菩薩如象王迴，觀察善財，作如是言，善哉善哉，善男子，汝已能發阿耨多羅三藐三菩提心，復欲親近諸善知識，行菩薩行，問諸菩薩所行之道。

初中，先讚。後教。今初。一讚發菩提心，在於偈前。
二復欲親近下，讚其近友問行，即前偈內。

善男子，親近供養諸善知識，是集一切智最初因緣。由樂親近善知識故，令一切智疾得成滿。是故於此勿生疲厭。

後善男子親近供養下，教也。謂教往近友，起無厭心。云何近友是種智初因。初有二義。一勝上義。故涅槃二十云，無上菩提近因緣者，莫先善友。二為本義。法無人說，雖慧莫知。故說近友為全梵行。下德生中，廣顯

其相。然靡不有初，鮮克有終。歷事多時，故宜勿懈。

△第二善財自言下，廣問廣答。先問。後答。

善財自言，聖者，唯願慈悲廣為我說。我應云何學菩薩行。應云何修菩薩行。

今初有十三句。望前偈中，文有二勢。一前別，此總。謂前明悲智度等別故。今於悲等總修學故。二前橫，此豎。前悲智等，位位同修。此修學等，從始至終，有前後故。文中初二為總。餘句為別。

應云何起菩薩行。應云何行菩薩行。應云何滿菩薩行。
 應云何淨菩薩行。應云何轉菩薩行。應云何深入菩薩行。
 應云何出生菩薩行。應云何觀察菩薩行。應云何增廣
 菩薩行。應云何成就菩薩行。應云何令普賢行速得圓滿
 。

總為學解學行。始修終修，皆名修學。唯因圓無學。果
 滿無修。又學攝於解，修攝於行。二句已收解行盡故。
 下諸友中，多但此二。餘句別中，一始起趣向。二即事
 造修。三令心遍滿。故梵本云，云何菩薩行中普遍滿。
 舊無此句。四治障離過。五轉劣向勝。舊亦闕此。六證

達分明。七出生未得。八觀察性相。九增廣令多。十具
 足獲得。十一究竟圓滿。若豎配者，一十住發起。二十
 行正行。三者十向廣大遍滿。四五六句並是初地。初淨
 二障。次轉成出世。後證入真如。七謂二三四地。世出
 世行，皆出生故。八謂五六二地。世與出世，四諦緣起
 ，般若現前，皆觀察故。九謂七地。功用行滿，得增廣
 故。十謂八九十地。無功用行，任運成故。十一十地勝
 進等覺位中，普賢大行，皆圓滿故。橫豎無礙，是此問
 意。

△二爾時文殊下，答中分二。先以偈頌教其求行。後以長行教其近友。一處皆讚發菩提心。

爾時文殊師利菩薩為善財童子而說偈言。

善哉清淨功德海	佛子能來至我所
發起廣博大悲心	勇猛志求無上覺
為欲度脫諸有情	一切世間流轉苦
已發大願深如海	勤修一切菩薩行
若有菩薩心堅固	久處生死無疲厭
彼當具足普賢行	得佛功德無能壞

福德威光福德星	福德生處福德海
汝能普為諸眾生	誓修普賢清淨行
汝見無邊諸佛土	去來現在一切佛
亦聞所轉妙法輪	念力憶持無忘失
汝於十方一切刹	普見無量諸如來
願海清淨悉皆成	具足菩薩塵沙行
汝入方便大法海	安住如來功德地
導師勝行汝當修	當成一切無師智
汝於一切廣大刹	所有刹土微塵劫
於中修習普賢行	成就最勝菩提道

汝於無邊劫海中	普遍十方一切刹
為欲成滿諸大願	修行普賢諸妙行
此中無量諸眾生	聞汝願已皆歡喜
悉發廣大菩提意	專心願學普賢乘

今初。十偈分五。初有二偈讚其發心。二有一偈略教無厭。三有一偈讚發心德。四有五偈具答廣教。五有一偈結其成益。今初。初二句總讚善來。餘六句出讚所以，以發心故。初句大悲下化。次句大智上求。次二句釋初大悲。後二句大願為主。又此亦是四弘誓願。二有一偈

略教無厭者，謂了性無取，即寂起悲，則眾魔為侍。不溺實際，故魔小莫壞。三一偈讚發心德者，為物發心，德不可量。故偏讚福。有智之福，映蔽餘福，為福威光。遍法性空，如列星宿。能生諸福，深廣如海。四有五偈具答廣教，含答上問。且約通說。一近佛聽法。二立願淨障。三入方便海。四遍一切刹。五經一切時。此五無疲，則普賢行滿，得如來地。大聖此中總教諸法，顯十信中總相信故。下諸善友各別示行，顯入位後別修證故。五一偈結益可知。

爾時文殊師利菩薩說此偈已，告善財童子言，善哉善哉，善男子，若有眾生能發阿耨多羅三藐三菩提心，是事為難。能發心已，復欲勤求行菩薩行，倍更為難。

第二長行教其近友中二。先讚。

善男子，汝今發心求菩薩道，為欲成就一切智智，應當勤求真善知識。

後善男子汝今下，教。謂但能求友離過，則前問皆圓。於中二。先案定。後誠勸。今初。上令求友不得不決。言善知識者，未知善法，能令人知。未識惡法，能令人

識。或二並通。識約明解。知約決了。瑜伽四十四，成就八支，為善友相。一戒。二聞。三證。四悲愍。五無畏。六堪忍。七無倦。八善語具。今云真者，為揀似故。具上八義，可得名真。又諸知識總有五種。一知識世間善惡因果而令修斷。二厭世樂而求涅槃。三有悲心而相心修度。四以無相慧令物修行。五無障礙修滿普賢行。此五前前望於後後，皆非是真。真唯第五。人能行此，是人善友。究竟善友，唯是如來。直就五法，名法善友。統而遍收，教理行果，皆善友也。淨名道品為善知識，行善友也。離世間品有十善友。恐繁不引。

善男子，求善知識，勿生疲懈。見善知識，勿生厭足。於善知識所有教誨，當念隨順，不應違逆。於善知識善巧方便，但應恭敬，勿見過失。

後善男子求善知識下，誠勸。隨順是勸。餘悉是誠。設有實過，尚忘非取法。至聖堯舜，其猶病諸。自除如來，孰能無過。以人廢道，翻是自欺。況權實多端，生熟難測。

善男子，於此南方有一國土，名曰勝樂。其國有山，名曰妙峰。彼有比丘，名吉祥雲。

第三善男子於此南方下，指示後友。於中二。先舉友依正。後勸往教問。今初。勝樂國者，次下知識寄當初住，勝過前位信所樂故。山名妙峰者。山有二義。一寂靜不動。二高出周覽。以況初住解心創立，依定發慧。寂然不動，智鑒無遺。徹見果原，下觀萬類。山以表之。登此心頂，便成正覺，故曰妙峰。友名吉祥雲。雲有四義。一普遍義。二潤澤義。三陰覆義。四靈雨義。故次四德謂定福悲智。具此四義，稱曰吉祥。又創入住位為吉祥故。創出外凡，故託比丘。

汝可往問，菩薩云何學菩薩行。菩薩云何修菩薩行。乃至菩薩云何於普賢行疾得圓滿。善男子，彼善知識當為汝說具足圓滿普賢行願。

教問云乃至者，譯人從簡，非當時略。梵本具牒前段問詞。

時善財童子聞是語已，心生歡喜，踊躍無量。於彼比丘，深生渴仰。於文殊師利，殷勤戀慕，頂禮雙足，繞無數匝，悲泣流淚，辭退而去。

第四時善財下，念恩辭去。慶聞後友，故歡喜踊躍。悵

辭德音，故悲泣流淚。下諸善友，皆準此知。然後二段義雖屬後，文在此會，此會說故。

問，大聖有智能演，善財有機堪受。何不頓示，而指他人，歷事諸友。下諸善友，例此為疑。

答，有十意。一總相而明，為於後學作軌範故。謂善財求法不懈，善友說法無吝。二顯行緣勝故。謂真善友是全梵行，如閻王之遇耆域，淨藏之化妙嚴等。三破愚執故。令不師愚心，虛己遍求。四破見慢故。謂令不觀種

姓，不恥下問，須遍敬事。五破偏空執故。謂不唯無求，無求之中吾故求之。六令即事即行故。寧可少聞，便能證入。不在多聞，不行不證。七破說法者攝屬心故。我徒我資，彼此見滅。八為顯寄位漸修入故。若不推後，位位中住，無有勝進。九為顯佛法甚深廣故。遍事諸友，不窮其原。真實善友，尚皆推勝。凡夫劣智，安能遍知。十顯善財與諸善友成緣起。善財有力，引發友教。善友有力，令善財證。互相交徹，能所莫二。無善友之外善財，則一即一切，明善財歷位。無善財之外善友，則一切即一，多位成就，皆是善財。由是卷舒自在無

礙。上之十義，初一通於師資。次五多約資說。第七約師。後三約教。